



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tiryimym@aolima



tir yimym

TAPAK 8



North Korea-i cruise missile ishika tendangogo



Rohan Bopanna No. 1 asayar tambusang kumogo

VOL. XXI NO. 102 (ADOK 102)

DIMAPUR YANGTEPNÜ (THURSDAY)

ANJETI (JANUARY) 25, 2024

₹ 5.00

Küm 44 sülen ULFA loksago

Guwahati, January 24, 2024 (Agencies): United Liberation Front of Asom (ULFA)-i Assam linük balaka akümtsü nükjidong yur tenteter küm 44 sülen parnok telok loksago.

December 29, 2023 nü ULFA-i Centre aser Assam sorkar den 'memorandum of settlement' nung sign sütepa sülen anogo 25 lir Sipajhar nung ULFA lokti senden ka amendang iba lemtet agi.

Olemtep nung adenba ULFA teloki tripartite agreement nung sign süa lir aser parnok teneter küm 44 sülen loksago.

ULFA-i ozüing alema inyakba toktsütsü, prangpong-injang ajak agütsütsü aser ita ka tsüingda telok loksatsü ta tripartite agreement nung lateta lir.

Assam kübok Darrang district nung Mongulbarnü onok senden amendang telok loksatsü lemtet agi ta ULFA General Secretary Anup Chetia-i ashi.

"Delhi nung sign sütepa nung shia aliba ama onoki telok loksatsü lemtetogo. Iba ajanga onok telok anema ken o tem benoka alibatem agientsü" ta ULFA chairman Arabinda Rajkhowa-ia ashi.

Senden nungsa züngsem 7 agi akümba monitoring committee ka tentetsü lemtet. Iba ya tripartite agreement nung aliba onük balala mapa küma inyaksü atema lir.

'Asom Jatiya Bikash Mancha' ta ser socio-cultural telok ka tentetsü aser iba ajanga loktiliba indang sobaliba aser oshiooben kümzüka ayutsü ta Rajkhowa-isa metetdaksü.

Tan ita tatemlenn sentong ka nung prangpong-injang ajak sorkar ket nung agütsütsü.

Külen, Paresh Barua-i aniba ULFA (Independent)-ibo linük balaka kümteta aotsü takhangba nungi masetshir aser olemtep nung madener.

Indo-Myanmar arrtsü matsüandangdaksütsü: NSCN (IM)

Dimapur, January 24, 2024 (TYO): India-Myanmar arrtsü atsüandangtsü tebilemba magizüker aser iba ya ozü temeten anema lir ta NSCN (IM)-i metetdaksüogo.

Iba ajanga Naga nunger tali lemsashitsü. Naga nunger ya kibong ka lir anungji anatsülen nungi free movement nungdaker, ta MIP, NSCN/GPRN-i sangdong ka nung ashi.

India sorkari tawa Free Movement Regime (FMR) agientsü lemtetba atema aoksar. Iba ajanga 1953 küm India Prime Minister Jawaharlal Nehru aser Burmese Prime Minister U Nu nati Naga nunger lemsatsüba

bilemtetdaksür" ta parnoki ashi.

Tenati international boundary ladangba ya Naga nungeri kodanga agizüka mali aser anatsülen aliba Naga nunger tetsükdaksü aika liaka kibong ka ama dang lia arur, ta MIP-i ashi.

Iba international boundary ladangba ya Mon district kübok Longwa chuba'er ki tiyongtsü nung süia lir aser iba ya taochi maliba mapa ka lir ta parnokisa metetdaksü.

Naga lima nung ozüing alema nisung Shinga marudaksütsü aser Naga nungeri ozüing alema arurtem azüoktsü, ta NSCN (IM)-isa metetdaksü.

NIT convocation nung Minister Imna Along aden

Dimapur, January 24, 2024 (TYO): January 24, 2024 nü Tourism and Higher Education Minister Temjen Imna Along National Institute of Technology 5 buba Convocation nung aden.

Nagaland nung iba reju nung kaketshirtem jenjang ka atonga ya nüma atangba mapang ka lir. Takok anguba kaketshirtem ya technical experts ama asütsü nenoki skills amshia nübortem tashi itdaksütsü ta Imna Along-i ashi.

Nenoki meranga zünga aser inyaka jenjang ka tongtetba ya konang ka mesüra degree ka ama dang masü saka linük yangerba aser nübor tashi itdaksüba nung amshitsüla ta pai ashi.

Nagaland nung tazüngertem ajanga kangshir kechiyong asen literacy rate kanga temaba jenjang nung lir. Tazünger jenti akümba ya nübortem, kibongtem aser sorkar asoshi khuret ka kumogo anungji asenok dak mangdang ka alitsüla, ta Minister Along-i ashi.

Centre sorkari state shia nung NIT, IIMs, IITs kaka alitsü atema mapa inyaker aser iba ya kanga dang akhümtsübutsu mapa ka lir. Tsüraburtem aser sensotemi NIT ama reju nungi tajangzük agitsüla, ta pai ashi.

Nagaland nung NIT-i kanga meranga inyaka arudar aser tanga Polythenics den külemi inyaksangsemtsü ayongzükter ka Along-isa ashi.

Arambai Tenggol-i anir Meitei MLA temi Manipur kümzüka ayutsü



Imphal, January 24, 2024 (Agencies): Meitei nunger telok Arambai Tenggol (AT)-i January 24 nü Kangla nung lokti senden ka ayonga amendang Meitei nunger MLA 36 aser MP 2 aden.

MLA temji ruling BJP aser Opposition Congress nungi liasü aser parnoki state kümzüka ayutsü aser longjema alitsü atema inyaksü tezüngzükter ka nung sign süogo.

Iba senden nung Chief Minister N. Biren Singh maden saka pai iba sülen document nung sign süogo.

Telungpurtem ta temulung meleme bilemertemi Meitei süng akor 4, village defence volunteer 1 aser police commandos 2 tepsetba sülen iba senden ayonga menogo.

Arambai Tenggol-i Meitei MLA tem dang iba ama nungdakba mapang ka nung politics tsütsü mangatettep toktsütsü aser külemi longjemer Manipur kümzüka ayutsü ayongzüka jaok.

Kangla nung ayonga amenba senden nung lanurtem, tetsürtem aser kaketshirtem dena nisung aika adenshi. Arambai Tenggol indang volunteers ya nisung 50,000 nungi 80,000 shi lir ta osang ajanga ashir.

Senden nung Arambai Tenggol-i 1951 base year ser

NRC mapa tenzüksü, Kuki telungpurtem den Suspension of Operation (SoO) agreement agientsü, Myanmar nunger refugees meyipa yoktsü, arrtsü atsüandangtsü, tanga Central forces-i Assam Rifles melenzüksü aser Scheduled Tribe list nung ozüing alema aruba Kuki nunger agientsü takhangbatem agütsü.

Union Home Minister Amit Shah-i Suspension of Operation (SoO) kübok aliba Kuki nunger azüoktsü nangzük ta AT tanishir Korounganba Khuman-i ashi.

Külen Naga kintem nungi dena MLA 35-i Centre dang Kuki telungpur telok 25 den SoO agreement agientsü takhangba agütsüogo.

"Iba ya meinyakra onoki nübortem den asüngdangtepa sülen tapet mapa inyaksü" ta parnoki ashi.

SoO agreement kübok telungpurtem designated camps nung alitsü aser prangpong-injang double lock kübok ayutsü lateta lir. Ajisüaka Manipur mepetmesü nung SoO agia aliba telungpur telok nungi züngsemtemi mapa inyaker ta tai tongloksür.

Kuki MLA 10-i AFSPA meshir

Manipur nung Chin-Kuki-Mizo-Zomi-Hmar MLA 10-i

Union Minister Amit Shah dang Manipur lendenlen Armed Forces Special Powers Act (AFSPA) tanaben benoktsü rongshio.

"January 21, 2024 nü Kuki-Zomi-Hmar MLA tem medeni 12th Manipur Legislative Assembly MLA tem den non-Meitei MLA tem tashiyim agi dendaksür Suspension of Operation (SoO) agientsü bangzüng ka renemogo. Külen tsütsü dang shir lemtetba ya SoO teloktem tenüng menüktsütsü atema lir" ta MLA 10-i ashi.

Kuki Zo nunger jila Moreh nung State Commando Forces rongnung Meitei nunger dena lir aser iba ajanga commando units nung Meitei telungpurtem dena inyaksangshiba kuli sayur.

"Moreh nung mapa lemezükja aliba police nungi Meitei nunger ajak agiener Churachandpur o Kangpokpi District tem nung ama lisopur police mapa lemezüksüra tensa süngjemtsü" ta parnokisa metetdaksü.

"Tang tashi prangpong-injang auyaba aser ozüing alema inyakba manener anungji Manipur valley nung AFSPA benokra Assam Rifles aser Indian Army ajanga State Police o IRB ket nungi auyazüka bener aoba prangpong-injangtem meyipa ngutetsü" ta MLA 10-isa ashi.

Anogo ananü Rüsoma Orange Festival amonger

Kohima, January 24, 2024 (TYO): Rüsoma Local Ground nung Bodbar nungi anogo ananü Rüsoma Orange Festival tenzükogo.

Iba sentong nung Horticulture and Women Resource Development Minister Salhoutuonuo Kruse aden.

"Iba benjung ya kanga tongtipang lir kechiyong Nagaland nung naring kanga tsünüba yimtsüng ka nung agir aser iba ya aluyimertemi

bendanga agüja inyakba ajanga lir" ta Minister Kruse-i ashi.

Asen tarutsü kanga tajung lir anungji azükaru aser peria alitsüsa asenok külemi longjemer inyaksüla. Asenoki sobaliba balala meyoktepa beshiba, akhidang nungi aruba inyakyim den tanü-asüng inyakyim sendaktepa inyaksüla ta lai ashi.

Horticulture ya teti melenshia aliba wadang ka lir aser asenokia tejakleni aoba sülen anidaksüla, ta Kruse-isa ashi.

Department of Horticulture-i naring tsünüba nung akokba tashi yariteptsü aser Rüsoma nung naring tsünür ajak yaritsü ta laisa metetdaksü.

Iba sentong nung Minister Kruse-i Rüsoma dang Horticulture Model Village ta jaloktsü aser Horticulture Department-i akokba tashi yaritsü metetdaksü.

Anogo ananü benjung atema naring stall 25 dena stall 55 lapoka lir.

ASÜPILA SENTEP SENTONG

Asür AYUTEMJEN AO (Kangtsüng) den asüpila sentep sentong January 25, 2024 nikongdang 2:00 ako nungi Tuli town, 17th mile nung par kidang agitsü.

Chümoukedima nung National Girl Child Day amung



Dimapur, Aenjeti/January 24 (TYO): District Administration aser District HUB for Empowerment of Women (DHEW), Chümoukedima ajanga Beti Bachao Beti Padhao kübok Chümoukedima Town Hall nung January 24, 2024 nü National Girl Child Day nungtem nung sentong ka ayongzüka liasü, kong Munesh Payal, IPS, Deputy Commissioner of Police aser Esther Aye, Chairperson, Child Welfare Committee, Chümoukedima nati iba sentong moaja liasü.

Esther Aye-i iba sentong nung ashiba agi, 181 ya emergency atema kisung masü saka tetsür aser tanurtem atema scheme balala indang osangtsüsang

agütsütsü atema lir. Lai kaketshirtem dang lenla ajak nung shisaliok ya kanga tongtipang lir, anungji shisaliok anguba ajanga lokti asoshi mapa tajung inyaktetsü, ta ashi.

Laisa sorkar dang Chümoukedima nung aliba care home ter nungi ana danga anepalutsü mepishia liasü.

Deputy Commissioner of Police, Munesh Payal, IPS ajanga iba sentong nung jembidang, nüburtem mulungsentsü nung 'discrimination' ya teti alir, ta ashi.

Aji ajangtetsü atema asen sasa asen ajungmesotsüla, aji asünung dang dangari mezüngmeshi masütsü, ta lai ashi.

Lai kaketshirtem dang pei sasa ajungmesotsü ayongzüka aser pei jangraba nung takok angutsüsa inyaktetsü ajungshia liasü.

Nai azüngtsü aser zülutsü meteta lira, rongsen lenmang nai bushitetsü aser nüburtemi na akumtsübotsü, ta lai ashi.

Laisa kaketshirtem aser tetsürtem dang meranga inyaktetsü aser dangar den memedemangtsü ayongzüka liasü.

Iba sentong nung menden ya Esther Sumi, Protection Officer, Chümoukedima liasü aser Mhashumi T Ezung, EAC & Nodal Officer, BBBP, Chümoukedima ajanga melepzüng o jembia.

Tanü National Voters' Day amungtsü

Dimapur, Aenjeti/January 24 (TYO): Linük tesem ajungalen State, District aser Booth Level nung January 25, 2024 nü 14th National Voters' Day amungtsü.

Iba anogomung ya "Nothing like voting, I vote for sure" omen nung ajemdaker amuntsü lir.

Commission ajanga State Government Department/PSUs

nung staff aser officers aser state nung ketdangsurtem dang anüingdang 11:00 ako meta mesüra January 25 nü mashi mapang ka nung NVD pledge agütsü totuyuba agütsüo.

Item sentong/inysangshi indang noksa ajunga hashtag#NVD2024 amshia pei social media mesüra website

nung upload asütsü metetdaksü.

Voters nem awareness agütsütsü mechi state nung aliba Government Departments/PSUs ajanga dang "Nothing like voting, I vote for sure" omen nung ajemdaker pei department nung January 25, 2024 nü 14th National Voters' Day amungtsü metetdaksü.

Stereo Groove-i 11th Multi-Media Campaign band tetoktepba akok



Kohima, Aenjeti/January 24 (TYO): Nagaland State AIDS Control Society-i ayongzüka 11th Multi-Media Campaign 2024 sentong Mongulbarnü State Academy Hall, Kohima nung agia liasü. Ken ajanga HIV awareness agütsüba sentong ya "Rise above HIV" omen nung ajemdaker agia liasü.

Iba sentong nung shilem agirtem den jembidang NSACS Project Director Dr. Ahu Sekhose-i HIV/AIDS indang tongmelang agi rateta ashi aser iba tashidak nungi pila alitsü aser awareness agütsütsü ajungshia liasü.

KROS College, Kohima nungi RRC züngsem Bampheu Pame-i tayongzüka o jembidang HIV den raratsü hadir tajungtibaji

shisaliok ya lir ta ashi aser lanurtem dang mashi angatetba, mesü-mokonga bilemba yimyatem yutsür osang shidak prokshiba nung shilem agütsü ajungshi.

Iba 11th Multi-Media Campaign band tetoktepba nung kentener telok asem, Stereo Groove, Naga Incarnate aser Kenney and the Faith Band temi shilem agia liasü.

Tetendanger tem ya Dr. Ahu Sekhose, Divine Connection nung frontman, kentener aser ken mejemer Obed Kath aser Collaborator, Producer and Artiste Mhaseve Tetseo nungertem liasü.

Iba tetoktepba nung Stereo Groove yagi temaba jenjang angu, Naga Incarnate-i tanabuba jenjang, aser

Kenney and the Faith Band ya tasembuba jenjang nguteta liasü.

Stereo Groove yagi Nagaland tenüng nung 5th North East Multi-Media Campaign, Shillong, Meghalaya nung shilem agütsü.

Iba sentong nung HIV/AIDS ken "Notun Akha (New Hope)" Aseno Metha-i aten. Iba sentong ya Mengu Suokhrie lenisüba kübok agi aser Metevinuo Sakhrie, Joint Director (IEC and MS), NSACS ajanga melepzüng o jembia liasü.

Multi-Media Campaign ya 2009 küm National AIDS Control Organization ajanga tentet aser ibai HIV/AIDS indang nüburtem nem tali tejangjaba metetdaksütsü mechi tenzüka lir.

COVID-19 Variant JN.1 atema tekumandangtsü metetdaksür

Dimapur, Aenjeti/January 24 (TYO): Tang linük nung Variant JN.1 ajanga COVID-19 cases tali akumba mechi Department of Health & Family Welfare, Mokokchung ajanga Mokokchung nung aliba nüburtem dang iba Covid sub-variant JN.1 ajanga timtem agütsütsü aliba nungi jenbuttsü asoshi tapet mera agütsü metetdaksüo.

Centers for Disease Control and Prevention (CDC) nungi tang tesüsa data agütsüba nung tang SARS-CoV-2 jateta aliba ya shilem 62 bo JN.1 ajanga lir ta ashir.

Tang tashinung linük nung nisung 1,640 dak COVID-19 Sub-variant JN.1 puteta lir. Indian SARS-CoV-2 Genomics Consortium (INSACOG) ajanga bendenba data nunga JN.1 variant ya India nung state 17 nung pokteta lir.

BA.2.86 ta ajaba SARS-CoV-2 variant ya ita ishika tejakdang temai adok aser virologists tem temulung nung kongshi, kechiaser iba variant nungya danga variant dang nungi mutations ya 30 ben agi tali lir. Ajsüaika 2023 küm tatemlen menatepa aoba SARS-CoV-2 variants indang telok tem madak BA.2.86 variant ya kodanga timba makum. JN.1 variant ya BA.2.86 nungi jakzüka lir aser

ibai mutations ka mesüra ana nungi kanga junga menatepa oteter. Iba variant nungya pa jakzüka indang immune evasion lir, saka kanga junga menatepa aotsüsa melenshiogo. Aketba mesüra hajiba mapang mask agütsüla mesüra tepang aser teni nembangtsüla. Arishi küm 60 dak tema, danga

tashidak alirtem mashisa aliba tetsürtem aser teintet rogotem dang mask agütsü ajungshir, kechiaser mask yagi COVID-19, yimra dang masü danga tango sashiba ajanga menatepba tashidak tem nungia kumzüker.

Sapon aser tzü amshia teka shidoktsüla, menüingdakba nung tenük, teni mesüra tepang nung mokongshitsüla, nisung telok aliba tesemi maotsüla aser aotsüsa kumra facemask inoktsüla.

Yimra agi tonger alirtem nungi pila alitsüla, peria mejangtsüla, temang yakyaka alitsüla aser anibelem masütsüla.

Tzü peria ajemtsüla, chiyongtsü tajung achitsüla, nüburtem alidak metzü memetsütsüla, Influenza aser danga respiratory illnesses kanga aliba tesemi maotsüla.

Yimra mesüra Influenza agi timtemra anasatiba Govt. Health Care Centre bushia aotsüla, kidang alitsüla, mesenzütsüla mesüra mapa mesüra school-i maotsüla. Kumzüka alitsü atema face mask amshitsüla.

Temang nung item timtem tenzüker anogo 7 mesüra taneptsü ngur ghonda 24 tashi dangar anasai maotsüla. Timtem tali kumra anasatiba Govt. Health facility nung osang agütsütsüla. Temang arongba, süka aitba, malaise, chiyongtsü mechinüba, temang angoba, mangmangba, hajiba aser mapang talanglang aketba (dry cough) alirtem tali kumandangtsüla.

Doctor tem den asüngdangya mesüi pei sasa mapang mask agütsüla mesüra mozü alia machitsüla aser doctor temi ashiba ama inyaktetsüla.

Kohima Police-i gari rakzüker ka apu



Dimapur, Aenjeti/January 24 (TYO): Kohima Bible College anasa mejangjaba nisung kati January 17, 2024 nü local taxi (Maruti Alto) ka driver ket nungi tashiyim amshia rakzüka bener ao, ta Kohima Police sangdong ka ajanga ashi.

Iba sülen Kohima Police-i

Medziphema PS personnel teyari nung iba gari rakzüksang arishi küm 29 tain Michael Dzüvichü ya January 22, 2024 nü apu.

Iba dak sendakba nung bushisingdangtsü asoshi North PS nung ken o ka benoka lir, ta sangdong ajanga ashi.

Tang mezüing BSF-i sepai tetsür-tem Pakistan arrtsüleni yoker

New Delhi, Aenjeti/January 24 (Agencies): Tang mezüing Border Security Forces (BSF)-i tetsür sepaitem telok ka Kashmir Valley nung Line of Control (LoC) anüktüsü atema yokogo.

Tang LoC nung temperatures minus 20 degrees shi aluogo ajisiüka tziyüm level nungi feet 14,000 tema nung tetsür sepaitem jagi teburtem den külemi linük arrtsü anüktüsü.

BSF tetsür sepaitemji mendanger amakba, aonung patrolling jajatsü aser kiralongrartem anema raratsü asoshi training junga agiogo, anungji linük tesem ajaklen tetsür sepaitem nem mapa lemzüktüsü atema tang mezüing item tetsürtem ajanga lenmang lapoktsür.

BSF tetsür sepaitem rongnung ka, captain Preeti Choudhary-i, "Onoki asen linük meimba ajanga onok yangi lir. Kanga temekong tesem aser oxygen ajema aliba tesemtem nung tsüingsang-mopung ajak tizüktetsüsa onok training agiogo aser Kashmir nungi tenzüka Rajasthan tashi nung tenzüktüsü atema onok renema lir," ta metetdaksü.

Tetsür sepaitem ket nungji INSAS, AK47, TAR aser SLR rifles lir.

BSF sepai tetsür, Mandeep Kaur-i, "Onoki arrtsülen kümzüktüsü atema inyaktüsü aser tetsür telok rongnung mezüing asüba atema pelar. Tensa tamajung, saka onok yangi lir," ta ashi.

Kashmir Valley nung tang kanga temekong saka LoC ya kanga tongtibang area ka lir, kechiyong tang ama asükwa

TMC-i Bengal nung tangar den meloktepi tokteptsü telemtetba agi

New Delhi, January 24 (Agencies): Trinamool Congress (TMC) tongti lenir, Mamata Banerjee-i taruba Lok Sabha elections nung West Bengal nung opposition INDIA teloktep nung aliba party tem den meloktepi tokteptsü telemtetba agiogo.

Karibo iba ya ajanga INDIA teloktep nung mangatettep adoktsü ta bilemer, saka karibo West Bengal Chief Minister-i iba telemtetba agibaji tim dang, ta ashir.

Shiv Sena (UBT)-i, "Ibaji imlaa aliba dang liasü. Mamata-i Congress den longjemer toktepbba nungji maongka kangabo mali," ta metetdaksü.

Mumbai nung osangbenertem den jembidang Shiv Sena (UBT) lenir, Aaditya Thackeray-i, "Mamata Banerjee-i Bengal nung keyi ama radar, aser state nung iba (Lok Sabha) tongbangji kanga tongtibang," ta ashi.

(Maneni tapak8 nung...)

mongpu nung tsükchirtemi arrtsü adena aittsü meranger.

Tetsür sepaitema aika arrtsüleni yokba ajanga LoC nung sepaitem tashi itshiogo.

BSF officer, Naresh Kumar-i, "Tetsürtemia teburtemi inyakba ama kasa inyakteter. Tetsürtemi lenla aika nung kanga junga inyakteter. Parnoki onok den kasa tongpo apua inyaker, aser onok kanga nüma atanger," ta metetdaksü.

BSF-i 2024 küm July ita tashi nungbo LoC nung aliba forward post ajak nung tetsürtem yoktsü tebilemba lir; iba ya linük puti otsü nung otsü tasen ka asütsü.

Ram tekülem ki semzükbba sülen linük tesema aika nung rarar

New Delhi, January 24 (Agencies): January 22 nü Ayodhya nung Ram tekülem ki semzükbba sülen tanü agi anogo ananübuba linük tesem aika nung tamangba lokti balala tsüingda raradar.

Mumbai nung aliba Mira Road nunga anogo ananübuba raraago. Iba tesem nung autorickshaw ka amakba, dokan aser garitem raksatsüba video ka social media nung prokshiogo, aser ibaji ajanga tamangba lokti ana tsüingda rara tulu adoktsüsa akümba tensa sayur.

Naya Nagar area nung lokti ana tsüingada mangatettep adoka raraba sülen Deputy Commissioner of Police, Jayant

Bajbale-i iba tatalokba bushisüingdangtsü tuyuogo.

Bajbale-i, Amongnü aonung 11:00 ako meta Mira Road nung aliba Naya Nagar kiyong nung Hindu nungertemi yimyim ayimba nungi rara tenzüka liasü. Iba tatalokba dak sendakba nung nisung 13 puogo aser bushisüingdang tenzüko, ta metetdaksü.

January 22 nü Ram tekülem ki semzükbba anogo nung Telangana, Bihar aser Maharashtra nunga tamangba lokti ana tsüingda raraba tatalokba aika liasü.

Telangana kübok Narayanpet district nung Hindu nungertemi mosque ka anasa crackers apokba nungi rara

tenzüka liasü. Bihar kübok Darbhanga district nunga Hindu nungertemi Muslim nunger leper ka nung firecrackers pokloktsüba nungi rara tenzüka liasü.

Gujarat kübok Vadodara nunga rara adok aser Madhya Pradesh kübok Jhabua nung Tenla kidang Hindu nunger saffron wako songa yutsüba nungi mangatettep adok.

Karnataka kübok Kalaburgi district nung Hindu aser Muslim nunger tsüingda rara adoka lung agi ontep aser Kotnoor yimdakbo Ambedkar indang kürakyanglu-a raksatsü. Tensa azüoktsü atema Wadi nungbo January 25 tashi curfew oziung benokogo.



Programme for

CELEBRATION OF 75th REPUBLIC DAY

ON 26th JANUARY 2024 AT NAGALAND CIVIL SECRETARIAT PLAZA, KOHIMA

0600 hrs : Unfurling of National Flag in all Government Offices, Institutions/ Public & Private Buildings.

0850 hrs : Review of Parade by DGP, Nagaland.

0900 hrs : 1. **Hon'ble Governor** arrives, unfurls the National Flag, receives Rashtriya Salute and inspects the Parade.
2. Address by the Hon'ble Governor.
3. Presentation of Awards.
4. March Past.

PARADE CONTINGENTS:

1. 13 Assam Rifles Bn
2. 78 CRPF Bn
3. 37 BSF Bn
4. DEF Kohima
5. 4th NAP Bn
6. 5th (IR) Bn Mizoram
7. 10th NAP (IR) Bn
8. 15th NAP (IR) Mahila Bn
9. Home Guards & Civil Defence & SDRF
10. Ex-Servicemen
11. 1 Naga Girls Bn NCC, Kohima
12. Kohima College
13. NPTS Brass Band
14. Nagaland Police Auxiliary Brass Band
15. 15th NAP (IR) Mahila Bn Pipe Band
16. 13 Assam Rifles Bn Pipe Band

Parade Commander : **Shri. L. Impung Chang**, NPS, Dy. Commandant, NAPTC
2nd in-Command : **Km. H. Pongloi**, NPS, AC, 2nd NAP Bn Alichen

CULTURAL PRESENTATION :

1. **Dance Performance** : "Jigra" (Women Resources Department)
2. **Cultural Troupes** : Art & Culture Department
 - a) Angami, Burgeon Society, Chedema : Indigenous Game
 - b) Pochury Cultural Troupe, Kohima : Indigenous Game
 - c) Lotha, Yachummaro Cultural Troupe : Folk Song
 - d) Phom, Bhumnyu Cultural Troupe : Folk Dance
 - e) Sangtam Women Cultural Troupe : Folk Dance
 - f) Zeliang Cultural Troupe, Kohima : Folk Dance

INAUGURATION OF EXHIBITION STALLS BY THE HON'BLE GOVERNOR

The programme will be livestreamed at this YouTube link

<https://www.youtube.com/live/t3ztVasuwLI?si=WQkCD371-T7XoF1Y>



TIR YIMYIM YIMOBILEM (EDITORIAL)

DIMAPUR YANGTEPNÜ, JANUARY (AENJETI) 25, 2024

Mesüngjemetba Manipur

Joko tang agi ita tukububa Manipur nung Manipur nungertem tipdema meliteti mapa ajak nung takoksa tulu ajurudagi. Yaküm May ita 3 nü Manipur nungsa süaka tenem kintem Naga nung aser Kuki nung na telongjem kaketshirtemi Manipur lendenlen alir Meitei nungertem nem Scheduled Tribe jenjang magütsütsüla ta lokti senden ayongzükba anogo nung, kechikomakaser, Naga nungertem yutsür Meiti aser Kuki nung na tsüngda azü dena tokshia lendong atalokba tang tashi manenteti Manipur lima tetsübu aser tarendak agi sünga lir. Tang tashi nung iba lendong atalokba nung nisung 200 dak tali taküm samaogo aser taliba kitem dang masü saka tenla ki dena aika rongdoktsüogo. Atangji, tanga lendong ka asübo tasür ka asüyonga taküm alirtembo tanaben ajurutepa yimjung yanglur lia lila, saka tang Manipur nung atalokba lendong yabo tanga lendong dang nungi balaka, kechiyong iba yabo kin ana tsüngda tongpang rara tenzükba amai kümogo. Joko, rara tenzükba ita tukububa nungbo Manipur nung Meitei nung kija asoshi temeten atema nokdaker Arambai Tengol teloki Manipur state madak tashi amshitsüsa tensa tia kati Manipur nungertem iadokogo. Aji oda, iba tashiji amshia yashi Arambai Tengol teloki Manipur nung Naga aser Kuki nung MLA-tem toktsür Meitei nung MLA aser MP ajak tesem ka nung jaoka Meitei nung asoshi inyaksü yimjak nung nangzükdaksüba jagi Manipur nung yaktabo tesünep mangutsü amaika repranger. Tamalen iba yimobilem nung lemsatepba ama, Manipur state nung lisopurtemji lendenlen Meiti nung aser tenemlen Naga nung o Kuki nung na lir. Ajisüaka, parnok rongnung telok anata putepa mali, kechiyong Naga nungertemi Manipur state kübok melinüi balaka razüka aotsü indang jembir, anungji Naga nung nukjidongji anema Meitei aser Kuki nungertemi anemer, ano Kuki nungertem ya Myanmar nungi tanen maka arua Manipur nung senso küma aliba purtem aika kümogo ta Meitei aser Naga nungertemi anema nokdaker aser ano külen Meitei nungertem nem Scheduled Tribe jenjang magütsütsüla ta Kuki aser Naga nungertemi nokdaker. Ano, tangbo jet ta meyiper Meitei nungertem Arambai Tengol teloki anir Kuki nungertem nem Scheduled Tribe jenjang agüja aliba nungi agientsüla ta takangba agüja lir. Iba ama Manipur tensa tiaji kodang bilemdangdir tokolak menütsüka aser May 03, 2023 jakdang aliba kasa Manipur state jenjangi mryipa arutsü asoshi kanga saaka kümogo. Iba ama tensa tia ka nung, ano külen Naga nungertem yimten telemtetba kati arua Manipur nung aliba Naga nungertem nem yimten jenjang balaka agütsü nungbo Manipur nungertem asoshi kodamasüba yimten tia ka ajurutsüa akok. Tang Manipur nung atalokba ya tema nungi reprangtsübo Meitei nungertemi Myanmar len nungi Kuki nungertem nungpoka adoka Manipur nungertem kümer aliba anema nokdaker amai, ajisüaka Kuki nungertem MLA-tem Imphal nung melitetsüsa aser tsübuba agi tatar sendenia moutetsüsa akümba tensa tia jagi tawa tanü Myanmar len nung arur Kuki nungertem kisung anema nokdakerbo memesük. Ano, kanga bilemdangtsü nungdaksüba tenla kitem raksaja aoba mapaji asütsü, iba jagi tamangba yimsü dena mereprangnüba aser maginüba jakla tamajung ka sayuogo. Iba ama tensa tia ka nung, yimteni linük temzüng ozüng amshia shitakba yimjung aser tesünep bushidi süra mapang tatsüka atema President's Rule agütsür nübor lenirtem ajurutepdakja inyak nung jungla aser Manipur nung tensa mapang agia aji akanger, ajisüaka tangbo PR melen Arambai Tengol teloki yimsü asütsüsa kümogo. Yimten lenirtemi tonga marui Delhi nungi repranga Arambai Tengol nem Manipur amshidaksü nungbo, tangbo Kuki nungertem dang saka memenui Naga nungertem asoshia timtem ajurutsü ana nung lir. Aji oda, Manipur asoshi ibai Manipur state agi asem küma yanglushiba mapang ka asütsüa akok.

OLEMSABANG

Ochimashi agi takar akümdangbo meranga inyaka tanü poksung tajungba

~ L.Kika Pongener.

(Yashi adok nungi...)

Tanü putu nung, tiyazü jembia, tangar ashiokja, mashilen nungi aazüka bener aruba rongsen agi kaa-ita alir-a aika lir. Tatishitsü agi... Election aruba shia Candidate-tem dang... Kü den nutschung-nubu noklang aika lir, kü sulen anidaktsüpur nisung aika lir... ta tiyazü jembia sen merijang/lakh aika meshir, tiyazü list tapak talanglang zülua sayur... Pei agitsü mimzüka yur, takar akümertem karbo alitsü akok. Ajisuaka, kanga junga shisadangra, tiyazü jembia, tangar ashioktsür, ashikülaka, aazüka bener aruba rongsen jagi anogo, ita, küm kwika chiyunga-jema litetsü...??? Ashiko, iba amala rongsenji kechi komala lenmang ka nung endoktsü shibai metet...???!!! Ashiko, kitsük-kirong lendong ka nungang mi agi rongreptsütsü asü (?) Ajongben lendong/mena-meyang kar nungang endoktsü asü (?) Maneptetba tashitak kar adoker Hospital nungang endoktsü asü (?) Mesura jala-jabaso mozü-mora achir kar inteter chireptsütsü asü...??? Tsüngrem oi ashir... "Tiyazü temeli agi anguba rongsenji meyipzüa alungba tangola, shirnoki itemji bushir parnoki tasüba bushir" (A.Shin-21:6). "Tamajung agi ajangzükba rongsenji kecha tajangzük mali" (A.Shin-10:2). Tiyazü o bangso-banglema jembia aazüka bener aruba rongsenji meyipzüa alungba tangola amai... Kecha temong maka amajok mapa kar nungang endokmatsüa shibai metet...???!!!

Ano azümesena mapa meinyaknu, kazüa dang aliba nisungji, kodanga kaa-ita anisungzüka malitsü. Ajisuaka, shirnok azümesen mesui mapa meranga inyaker, parnokjibo kodanga anung-akonga, timtema, sensaka malitsü. Aji oda, pei sasa meranga inyaker, aazüka bener aruba rongsen-jibo tera dang asüyongjia nang-nanga achitsü. Tsüngrem oi ashir... "Azümesen takümi sashia aginur aser kecha makar; Saka tenendakba takümüji yiraa kümdaktsütsü" (A.Shin-13:4). "Züsenba ajak nung tajangzük lir; Saka tebangi jembiba agi dangbo anung-akong dang tendaktsür" (A.Shin-14:23). Azümesener jagi aika aginur, saka pai/lai meinyak nungji kecha makar, saka tenendak/meranga inyaka agibo yiraa akümtsü/takar akümtsü.

Ano tangar dang azü küma meshimetsüa, tangar dang aputaka külema, takar akümdang nungibo, pei sasa meranga inyaka terara bendener, asen sasep peria, tanü poksung aliba-sa ajak tang tajungtiba. Takar/tulur/sentsü-keter dak metaloker, par dang apoa, meshia takar akümbaji, arishi piyong, chirnur/semchi-semnur tashi, par lar kümer, par küpok, par tenzüka alitsübaji kecha jangrademtsü mali. Kechi-koma'ar ka mejungketa akayongjia, tangar dang meshimetsüa takar akümbaji kecha mera maket. Pei sasa meranga inyaker, asen kechi aka aji agi tenuk sunger, talila merumero mesui, asen sasep peria chiyunga-jema aliba-jisa ajak dang tajungtiba. Tangar dang apoa/meshia shi/ango den chiyungba dang nungibo, pei sasa meranga inyaker, nupangso/etsük-ontsü/ngashi lon/azüng-kenshi lon den chiyungba tanangba. Shirnoki tangar dang lala-shiponga, meshimetsür, parnokji kaa-ita aliyongjia, tangar dang tim o meshitetsü, tangar nukrang metizüktsü, tangar tejak maremtsü. Ajisuaka, shirnok pei sasa meranga inyaker pei tepok sunga lidir, parnok jagi shinga daka metsükdaki tanak dang tanaka... ta shitetsü... temesung dang temesunga... ta shitetsü. Ajak dang indang-indanga yabo meshitaka/taia/majunga... ta shitetsü.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Sorkari World Vision India indang FCRA license agientsüogo



2021 küm India nung Covid wara tamajungtiba mapang nung Khristan melungtet telok, World Vision India-i nüburttem nem teyari agütsüdang tangokba noksa nung angur.

January 24, 2024: India sorkari ano Khristan melungtet telok ka nokdangogo; World Vision India ya India nung Khristan melungtet telok tulutiba lir.

World Vision India nung züngsem kati, "Centre sorkari onok indang registration agientsüogo, anungji joko onoki bendanglen nungi senotsü mangutsü," ta metetdaksü.

"Iba tenokdangba ajanga linük nung iba telok indang project balala kongshitsü," ta paisa ashi.

World Vision India-i tesüiba küm 70 dak tema India nung talisa tanurtem dak rangloker inyaker.

India sorkari World Vision India indang Foreign Contribution Regulation Act (FCRA) registration agientsüba ajanga linük nung parnok mapatem ajak kongshitsü, kechiyong linük kija nungi anguba senotsü agi linük tesem ajaklen mapa meinyaktetsü.

World Vision India-i ashiba agi, parnok mapatem ajanga India kübok state 22 nung tanur 3,000,000 aser parnok kibongtem tajanzük angur.

Khristan melungtet telok yagi state sorkartem aika den tezüngzüktep agia lir.

World Vision India indang FCRA registration registration agientsüba kuli Home Ministry-i memetetdaksü aser registration agientsüba anogo-a memetetdaksü.

Osangbenertemi Chennai yimti nung aliba World Vision India indang headquarters nung ketdangsertem den metetpelatsü merang saka parnoki telanzüba kecha magütsü.

2021 küm World Vision India-i FCRA license renew asütsü atema application agütsüba sülen 2022 küm November ita nung registration agiena liasü. Anogo 180 tashi license agienba sülen maneni yaküm May ita tashi agien.

2022 küm registration agientsüba ajanga parnoki project aika anentsüsa aküm.

World India Vision-i maneni Home Ministry dang sentsüh aotsü atema bendanglen nungi senotsü teyari shilem 25 danga agizütsü temelaba agüjang ta mepishi saka tang tashi temepishibaji magizük.

Tan ita home ministry-isa New Delhi nung aliba melungtet telok Centre for Policy Research indang FCRA registration-a agienadokogo.

2014 küm Bharatiya Janata Party lenir, Narendra Modi Ato kilonser akümiba sülen tang tashi nung melungtet telok 16,000 dak tema indang FCRA license agientsüogo.

2022 küm January ita tashi nung linük nung FCRA register süa aliba melungtet telok 16,989 liasü. India nung sorkari Mother Teresa-i tenzükba Missionaries of Charity densema Khristan melungtet telok indang FCRA registration aika agientsüogo.

Comoros nung Tir election sülen Khristantem maneni timtemtsü

January 24, 2024: Taoba hopta Comoros nung election agia taoba mapang Tir, Azali Assoumani-i maneni takok nguogo, anungji iba linük nung Khristantem ano maneni reshikangshitsüa akok, ta International Christian Concern (ICC)-i metetdaksü.

Comoros ya Africa anüdoklen tsütsü aliba asetkong linük ka lir.

2002 küm Assoumani Tir aküm. Pa 2002 nungi 2006 küm tashi Tir inyakba sülen agiba Tir election nung Ahmend Abdallah Mohamed Sambi-i pa atsüngdoka liasü. 2016 küm nunga Assoumani-i election nung takok anguba sülen Tir kümsük küm talangba akümtsü atema linük temzüng yanglushia liasü.

Taoba hopta Khristantem densema minorities lenirtemi election nung ochimashi liasü, ta aija longkak aitba mapang

nung nisung trok kanga mejungi yiru aser ka asü.

Tawa agiba election nung Assoumani-i vote shilem 62.97 nguteta liasü.

Comoros linük temzüng nung yamai shia lir, "Islam ya linük yimsü lir aser sensotemi Sunni Islam indang Shafi'i school nung tesayubatem nung ajemdaker alitsü aser tekülem agitsü atema temzüngtem latetsü. Comorian nungertemi linük maittsü sayatsü aser ibaji yimsü ka, Sunni Islam nung ajemdaker asütsü."

Comoros nung nütsüng shilem 98 Sunni Muslim nungertem lir aser tanüngba nütsüng shilem 2 ji Roman Catholic, Shia Muslim, Ahmadi Muslim aser Protestant Khristantem lir.

Tir, Assoumani ya Sunni Islam yimsü alia amanger ka lir, aser pa Tir inyakba mapang tashi linük nung Khristantem

sadema melitetsü.

U.S. Religious Freedom 2022 Report ajanga ashiba agi, iba linük nung tamangba yimsü temeden ajungkettsütsü atema U.S. embassy nungi ketdangsertemi mapang shia yimsü sasep nung nütsüng ajema aliba lenirtem ajurua jembir.

"Comoros nung yimsü temeden ajungkettsütsü atema US sorkar aser Comoros nung melungtet teloktemi maneni inyaktsü onoki imlar. Tang Tir tasenba kübok Comoros nung yimsü temeden ajungkettsütsü atema US aser Comoros nung ketdangsertem den tesendaktep maneni ayutsü onoki ajungshir. Tang ama tensa ka nung Comoros nung Khristantemi yimjung aser tesünep angutsü, iba denji külemi kecha tarendak makai pei yimsü benshitetsü atema onoki sarasademtsür," ta ICC-i metetdaksü.

ANOGO ABEN TSÜNGREM DEN

Tenzüktsü anunger


Ne nüburi na raraba anogo nung peisasa mulungteta adoktsü. T.Ken 110:3

Asentenshiba tamaittsü kaji, koba mapang nung Tsüngrem ain nung Pa nüburi dangi arur pa tenzükba mapa nung parnok taküm agütsütsü anungbaji lir. Arogo aika nung Tsüngrem mapa nung bendanga agütsür nübu agi anünga lir. Pa talangzükba mapa nung yaritepa inyaktsü temulunger nübu mangur. Tsüngrem tenanzükba mapa mangashir aika dang lir aser Khristantem item mission wadang jagi aotsü ayimtener. Asenoki nungdakbaji temulunger aika adoktsü mepishitsüba masü saka Tsüngrem ain yokang ta mepishitsüba lir. Kodang Tsüngrem Pa ain nung nüburi dangi arudir pa mapa asoshi temulunger nübu aser teyari agi anünga malitsü!

Tanü Khristan aikati aser arogo aika nung missionji mezüngbuba mekümdaktsür. Ibai kechiba süra asenoki asen ajaba lemanji samadok. Asenoki kotaki aotsü temsüa akümtsü atema dangbo mekümsük. Tsüngremi asenok samaa aliba lima kümzüktsü asoshi Pa den külemi inyaktsü asoshi kümzük. Asenok Pa den tesendaktep akaba ajanga Pa mission asenoki inyaktsü akok.

Tsüngrem ain ajanga dang asenok pei atema dang bilemba nungi anitettsü akok aser mission tsütsüi meyipdaktsütsü akok. Parnok aruba lenmanji ibaji dang lir. Pa ain asenok ajanga sayutsü asoshi asenok dak tagizükba temulungjang akatsü nungdaker. Isaia den, "Ni yangi lir, ni yokang!" ta shitetsüsa ne mulungjang Tsüngrem meimba agi sünga lir ma ?

'The Chosen' season four London nung sayaogo



January 24, 2024: Khristan TV show 'The Chosen' season pezübuba Hombarnü ((January 22) London nung aliba Leicester Square nung sayaogo.

Yisu Khrista taküm otsü nung ajemdaker yangluba show nung Yisu Khrista-i inyakba mapatem kuli süa angurtemi kuli agütsüba otsü densema lir.

The Chosen season 4 sayaba sentong nungji iba show nung shilem agirtem, otsü zülurtem- Ryan Swanson aser Tyler Thompson na aser executive producer Brad Pelo nungera densema liasü.

Iba series nung Yisu Khrista indang shilem agisang, Jonathan Roumie-i, "Iba season (pezü) piyong onoki tayongzükba jenti ajangshia liasü. Shi nunga kanga anibelemogo, anogotem kanga talang liasü aser tsüngsang-mopung ajanga-a onoki tayongzükbatem ajangshi," ta metetdaksü.

Paisa, "Ajisüaka tatembang nungbo onok indang

nükjidongji- nisungtemi rebrangnüttsüsa onoki yanglutsü liasü," ta shisem.

Executive producer, Brad Pelo-i, "Iba season ya temelung shirangtsüsa asütsü, kechiyong Yisu-i reshikangshi ajangshitsü," ta metetdaksü.

Iba series nung Andrew shilem agisang Noah James-i, "The Chosen ajanga kü taküm melenshidaktsüogo. Iba sereis ajanga nisung aika taküm nung kongshiba otsü kodang ni angashidir ni kanga pelar. Actor ka ama ni iba dakji alaka kecha maginer," ta ashi.

Mary Magdalene shilem agila, Elizabeth Tabish-i iba project ya web series ka ama kanga tongmelang tenzük saka kanga takok ngua arudar, ta ashi.

Laisa, "Onoki mezüngbuba season-a renemtsü asü merenemtsüar memeteti liasü, ajisüaka onoki iba jenjang tashi tongtetogo," ta ashi.

The Chosen season four indang episodes 1 aser 2 February 1 nü UK aser Ireland nung aliba theatres nung sayatsü.

AO OSHI ANGAZÜKDAK:

TANÜ ANGAZÜKTSÜBA OJANG



Shisakar

(n) shisatsü timi amshitetba nisung (wise person)

* Shisakar nisungi tarutsü atema bilema inyaker.

Shisakuti

(n) shisa aika angudak (place of wisdom)

* Asen lima nung kaketreju ajak ya shisakuti kümdaktsütsüla.

OLONG PAITEP # 6677

1			2		3		4		5
6		7							
					8				
9				10					
							11		
			12						13
	14							15	
					16				
			17						
								18	
19									

TIPIEN

- 2. Teburtemi tejak nung awaba
- 6. T _ _ _ em
- 8. Tzüik ayudak
- 9. Nüingdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüingda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6676 TELANGZÜBA

TIPIEN :

- 1. Telok, 4. Aluru, 6. Ozüing,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kiochtsü, 5. Lenti,
- 7. Tajanzük, 11. Teronem,
- 12. Sempa, 13. Jahaz.

NAI-A YA METETTER MA



Saudi Arabia yimtiba Riyadh nung mezüingbuba alcohol store ka lapoktsü aser iba ya non-Muslim ketdangsürtem atema dang lir ta January 24, 2024 nü metetdaktsüo.

Saudi Crown Prince Mohammed bin Salman-i Muslim linük tourism aser business atema kishi lapoktsütsü merangba nung iba lemtet ya kanga tongtipang lir kechiyong Islam nungbo yi ajemba noktanger.

Iba store tasen ya Riyadh nung aliba Diplomatic Quarter nung lapoktsü aser non-Muslims dang dang ayoktsü.

Mizoram Raj Bhavan-i state 4 aser UT 1 Foundation Day among



Aizawl, January 24, 2024

(Agencies): Mizoram Raj Bhavan-i Manipur, Meghalaya, Tripura, Uttar Pradesh state tem den Dadra and Nagar Haveli & Daman and Diu Union Territory Foundation Day benjung ayonga mongogo.

Ek Bharat Shreshtha Bharat kübok ayongba sentong nung Governor Dr Hari Babu Kambhampati-i tesenteper ajak pelashishia agizük.

Raj Bhavan nung aliba Durbar Hall nung Manipur, Meghalaya, Tripura, Uttar

Pradesh aser Union Territory of Dadra and Nagar Haveli aser Daman and Diu sentsütem aser sobaliba noksatem ayu.

India ya nisung temeyoktep aliba linük ka lir aser Northeast nungi state 3, North nungi 1 aser Union Territory ka longiemer Ek Bharat Shreshtha Bharat tangatetba nung iba benjung amonger ta Governor Dr Hari-ashi.

"Prime Minister-i Viksit Bharat by 2047 mangdang yua lir aser pai lanurtem dang nungi tebilemba tasentem meshiogo.

Asenoki sobaliba ajak angatetsüla aser benjungtsüla aser sensotem tsüingda tesentaktep akangshiteptsüla" ta pai ashi.

Iba sentong nung states 4 aser Union Territory 1 tobur ajungba aser nübertem indang video clips sayu.

Meghalaya Governor Phagu Chaudan-i anir state aser UT ketdangsürtemi video message lemsatop. Sentong nungsa tsüingsang balala aser tanga shilemtem agia benjungtep.

Lower Assam nung nisung aikati Rahul'er sentong nung aden

Guwahati, January 24, 2024 (Agencies): Lower Assam nung Barpeta aser Bongaigaon tsüingda Rahul Gandhi'er 'Bharat Jodo Nyay Yatra' nung nisung aika aden.

Rahu Gandhi amenba gari den tanga garitem süidang nisung aika yimdong nung adenshi.

'Bharat Jodo Nyay Yatra' tenzüker anogo 11 buba nung

Barpeta nungi rally tenzüker. January 18 nü Sivasagar nungi tenzükerba sülen anogo 8 tsüingda Assam kübok district 17 sema senzütsü.

Nyay Yatra tenzüker kilometres 833 semogo aser iba mapang public den ajurutepa sensaksema aser roadshows balala ayonga agiogo.

Iba yatra Nagaland nungi Assam-i aruba sülen Haluating

nung mezüingbuba sentong agia tenzüker.

Rahul-i Majuli semdang aser idangji pai Kamalabari aser Aunati satras nung procession agi.

Maneni, Jorhat, Gogamukh aser Arunachal Pradesh yimtiba Itanagar asema sülen tanaben Assam-i aru.

Bodbarnü Rahul Gandhi-i Bongaigaon toktsür Abhayapuri-i apusoa ao.



**GOVERNMENT OF NAGALAND
DIRECTORATE OF GEOLOGY & MINING
NAGALAND, DIMAPUR**

No. DGM-6/25/2023/6944

Dimapur, Dated 23rd January 2024

NOTICE INVITING TENDER

The Directorate of Geology & Mining invites tender for Detailed Exploration in:

- * Changki Coal Block A, Mokokchung District in the State of Nagaland
- * Changki Coal Block B, Mokokchung District in the State of Nagaland
- * Northern Khar Coal Block, Mokokchung District in the State of Nagaland

The detailed tender documents can be viewed / downloaded from the following website, from 24th January 2024, 1100 hrs (Server Time) to 26th February 2024, 1700 hrs (Server Time):

- * www.nagalandtenders.gov.in
- * www.nagaland.gov.in

Amendments/Corrigendum, if any will be hosted on the above website.

Sd/-
KHIKIYA RENGMA
Director.

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA**

NO.HED/SCHO/2022-23/

Dated, Kohima, the 24thJan. 2024

Biometric authentication for State Nodal Officers (SNOs), District Nodal Officers (DNOs), Heads of Institutions (HOIs) and Institute Nodal Officers (INOs) registered in National Scholarship Portal (NSP)

Ref: F. No. 1-34/2020NS-1, dated 17th Nov. 2023
Govt. Of India, Ministry of Education

In pursuance of the Ministry of Education, Government of India letter number cited above, it is hereby notified to all the SNOs/DNOs/HOIs/INOs irrespective of the Scheme/Ministry registered in the National Scholarship Portal to complete the bio-authentication at the earliest. The Scholarship applications in the NSP cannot be verified unless bio-authentication is completed. Bio-authentication can be done at the Common Service Centers (CSCs).

Sd/-
(Dr. N. NSHENA NEKHA)
ADDITIONAL DIRECTOR
HIGHER EDUCATION
NAGALAND: KOHIMA.

**OFFICE OF THE PRINCIPAL
CLARK MEMORIAL HIGHER SECONDARY SCHOOL, IMPUR
SITUATION VACANT**

- 1. UGT (Science) - 1 Post**
Requisite Qualification - Minimum Pre University in Science stream with PSTE/D.El.Ed from a recognized university/institution.
 - 2. PGT (Education) - 1 Post**
Requisite Qualification - Post Graduate in concerned subject with B.Ed
 - 3. Warden (Female) - 1 Post For Junior Hostel**
Requisite Qualification - Graduate in Arts/Science/Commerce/Theology (B.D. or equivalent) from a recognized University.
 - 4. Warden (Male) - 1 Post For Senior Hostel (Boys)**
Requisite Qualification - Graduate in Arts/Science/Commerce/Theology (B.D. or equivalent) from a recognized University.
- Interested candidates fulfilling the requisite qualification only may submit their complete Bio-Data through the school mail provided, on or before 31st of January 2024, addressed to Principal CMHSS, Impur.
Email: cmhssimpur1895@gmail.com
- Interview will be conducted on 1st of February from 10:00 AM onwards in the Principal's office. No separate calling letter will be served. Candidates must produce original documents at the time of interview.

Sd/-
Principal
CMHSS, Impur

"Ni rara tajungji raraogo, ni alizung tonga asemogo, ni tamangji yuogo".



Lt. Jungshikokla Longkumer (Ungma)
1930- 12.01.2024.

Onoki teti meima aliba tsürabur, la manemi aliba mapang aser la Kibuba kidangi meyipa aoba mapang nung shirnokisa ozü khuret ajak nung nübu, rongsen, shisatsü, sarasadem aser lenmang balala ajanga yaritepogo, ajak dang kanga pelaba lemsateper. Tsüngremi nenok ajak nem tatem makai temoatsü agüjang ta onoki sarasademsür.

Temeim Chirnur, Semchirsepnur, Kinungertem aser Anükapang

ANM, SCHOOL OF NURSING, IMPUR CHRISTIAN HOSPITAL
IMPUR-798615, MOKOKCHUNG, NAGALAND
email: ichabam2015@gmail.com

Ref No. ICH/SON - 2/VTC/24 - 1 Dated: 24th Jan 2024

ADVERTISEMENT

Applicants are invited for the unmarried girls for undergoing **GENERAL DUTY ASSISTANT/BEDSIDE ASSISTANT** course at Impur Christian Hospital, ImpurMokokchung for the session 2024. The following particulars are given for information of interested candidates.

- Forms can be availed from the Office of the School of Nursing, Impur Christian Hospital and from Impur Diagnostic centre, Mokokchung.
- Last date of Form submission will be **10.02.2024**
- Qualification: 8th passed (Preferably 10th passed)
- Training fee will be Free.
- Course Duration: 10 Months
- All other details will be present on the form.

Sd/
Medical Superintendent
Impur Christian Hospital

TEPELA TASOBA ANOGO LEMSATEPER



Tasoba anogo: 25 January, 1939

Temeim ojala **Mrs. Watisenla Jamir (Asangma)**, iba alimai arur arishi küm 85 tashi abensa onok asoshi tanüla aser alishi nung akhümdong aser len sayur ka ama litettsüsa tanü tashi arishia yutsü nung Tsüngrem tenüng asanger. Maneni ojala nem arishi anogo den anema aliba taküm moajangma ta sarasademsür.

Oja, onoki na kanga meimer aser ne temeim asoshi kanga pelar.

-Temeim Chirnur aser Semchirtem.

North Korea-i cruise missile ishika tendangogo

Seoul, Aenjeti/January 24 (Agencies): North Korea-i par linük anüolen tzüküm nungi cruise missile ishika tzüym leni khaketa yokogo, ta South Korea-i Bodhbarnü sangdong ka ajanga metetdaksü.

Seoul indang Joint Chiefs of Staff (JCS)-i ashiba agi, missile tem ya Bodhbar anepdang khaketa yoka liasü.

"North Korea-i Yellow Sea leni anepdang 7:00 ako (22:00 GMT; Mongolbarnü) shi nung cruise missile khaketa yokba onoki indang military-i lazükogo," ta JCS-i sangdong ka ajanga metetdaksü.

"Iba dak sendakba nung South Korea aser US intelligence ketdangsürtemi ken o tejangja metettsü atema bushisüngdangdar," ta JCS-isa metetdaksü.

Pyongyang nem nuclear weapons programme dak sendakba nung United Nations-i tenokdangba tesashi agütsür lir, ajisüaka parnoki solid-fuelled hypersonic ballistic missile aser tzü telung nung amshiba nuclear-capable drone ka densema taküma missile tem maneni tendanga arudar.

UN-i tenokdangba agütsür aliba kübok cruise missile tendangtsü asoshi temelaba agüja mali, ajisüaka JCS-i ashiba agi, parnoki North Korea inyakyim maneni asadanga arudar.

Cruise missile ya jet-propelled missile tem lir aser ballistic missile tem dang nung tenemzükba alur ayimer,

ajisüaka ken o asadangeremi ashiba agi, iba ya South Korea aser Japan asoshi lendong asütsü akok, kechiyong item missile tem ya radar aputsü tasak asür.

Ita ishika tsüngda Korean Peninsula nung tensa nung tamajungba küma odar, kechiyong North Korea lenir Kim Jong Un-i maneni prangbong injang aser hadir balala yangludat aser nüngdak dang süra nuclear amshitsü ta United States aser iba tesem nung parnok den sendaktepa alirtem amokmerena arudar.

Kasa mapang nung Japan, South Korea aser US-ia asendanshir military exercise balala aika ayongzüka agia arudar, koba Kim-i ashiba agi, parnok amaktsü asoshi renemshiba ka lir. Linük asem yagisa US indang hadir balala dak amendaker parnok linüktem kümzüka ayutsü asoshi tasa balala asadar.

South Korean Navy indang special warfare unit tang linük anütok tzükümlen North Korea den arrtsü anasa training ka nung shilem agia aliba mapang North-i item cruise missile tem tendangaogo.

Anogo 10 agitsü aliba training koba Brehostibarnü tembangtsü, iba ya tawa North Korea indang military-i inyakyim balala benoka inyakba sülen rara asoshi renemshiba tali tashitaitba kümdaktsütsü nükjidong nung ayongzüka agidar, ta JCS-i ashi.

North Korea lenir Kim-i parnok South Korea den longjemtsü asoshi jembishinüa aruba toktsüogo aser ashiba agi South ya parnok tsükchir tulutiba lir.

Kim-isa, meter 30 talang Pyongyang monument koba South Korea den longjemtsü atema nükjidong aliba temaitsü lir, iba ya-a raksatsü asoshi tetuyuba agütsür alitsü akok.

NK News, kobai linük nung tatlokba aser terenloktem indang asadanger, parnoki ashiba agi, Mongolbarnü satellite-i agiba noksa nung National Reunification atema Three Charters Monument, koba dang Arch of Reunification ta ajar iba Monument ya noksa nung mangu.


Iba monument ya Pyongyang nung lenmang tongtibang ka nung 2001 küm yangluzük. NK News-i ashiba agi, Kim-i iba ita Supreme People's Assembly senden amenba mapang iba Monument reprangdang tenük ashir, ta shia liasü.

Kasa mapang nung North aser Russia na tensendaktep tang kanga junga kümдар aser anüolen aliba linüktem aser South-i, Ukraine rara nung amshitsü atema North-i Russia nem artillery inyaka million aika agütsüogo, ta shia arudar.

Taoba küm Kim-i Russia semdanga Russia tir Putin den ajurutepogo aser Russia nung tongtibang lenirtem aikati North semdangogo.

ALI AYOKER

AT AOYIMKUM
Rs. 250 per sq. feet
Two minutes walk from
Futsal ground, Indisen
Contact: 9856 278136



Doomsday Clock: Ayatirm atongtsü second 90 dang lir



Washington, Aenjeti/January 24 (Agencies): Scientists temi Doomsday Clock indang teka ya ayatirm atongtsü seconds 90 nung yuja lir aser ibai "Doomsday" - nuclear Armageddon - atongtsü anasatiba alitsü. Nuclear nok-nü yanglutebpa, Ukraine rara aser tzü-mopung melenba ajanga iba anütetsü indang teka belenshi ta scientists temi ashir.

Nuclear aliba Israel-i Gaza nung raraba ya kuli ka lir, ta Bulletin of Atomic Scientists temi ashir.

"Alima tesem balala nung raraba ya nuclear tsütsü timtem ajurutsü jengang nung lir, tzü-

mopung melenshiba ajanga nisung asür aser teraksa bener arutsür, aser AI ama timtem agütsüba technology tem aser biological research ya wazüka ayuba dang nungi tekeraba tejakleni aor," ta iba Bulletin indang tir aser CEO, Rachel Bronson-i ashi.

China, Russia aser US linüktemi parnok indang nuclear arsenal tajungba kümdaktsütsü asoshi rongsen jenti indoker aser itemji ulushir aser aibelenba mesüra meshidak asadanga ajanga nuclear war ajurutsü jengang nung lir ta scientists temi khuret lemsateper.

(Maneni tapak 8 nung...)

7buba KSON asayamung tenzükogo



Dimapur, Aenjeti/January 24 (TYO): 7buba Kuki Students' Organisation Nagaland (KSON) Sports Meet, January 23 nü Peren District kübok Khelma-Sailhem yimtsüng nung tenzükogo.

Hopta ka tepeyong asayatsü aliba asayamung

lapokba sentong nung Director, Youth Resources & Sports, Kethosituo Sekhose alakteta jaoker liasü aser BDO, RD Agunaqa Block, Niuland, Ghukato (Yabo) Awomi tetushi tejaoker liasü.

Iba asayamung ya "Progressing Together" omen nung ajemdaker asayadaki.

Asayamung nung mezüngbuba football asaya nung Saijang Youth & Students' Union-i tie breaker ajanga goal 4-3 agi Inbung Students' & Youth Union koka liasü.

Iba asayamung nung KSON kübok unit 19 asaya balala nung shilem agidar.

Australian Open: Medvedev, Dayana & Zheng nunger semi-final-i iogo

Aenjeti/January 24, 2024 (Agencies): Bodhbarnü Daniil Medvedev-i Australia Open tebur kija asaya quarter asaya nung Hubert Hurkacz koka semifinal-i iogo aser tanabuba Grand Slam akoktsü asoshi timla lir.

Rod Laver Arena nung Russia nunger world number 3 asayar yagi iba asaya nung Poland nunger asayar ya 7-6 (7/4), 2-6, 6-3, 5-7, 6-4 agi koka liasü. Tena tsüingda ghonda pezü jungnüa asaya.

Pa semi nung Spain nunger second seed asayar Carlos Alcaraz mesüra Gremany nunger sixth seed asayar Alexander Zverev den asayatsü.

Iba asaya ya Medvedev

asoshi Grand Slam asaya 100buba liasü aser pai tang agi Grand slam semifinal tibuba tongtetogo. Pai 2021 küm US Open koker lir.

Pai 2021 aser 2022 küm Melbourne nung final tonga asayaogo saka Novak Djokovic aser Rafael Nadal na mekoktet.

Kasa asayamung tetsür kija asaya nung Ukraine tsür Dayana Yastremska-i Czech tsür Linda Noskova koka, Open Era nung tetsür qualifier tem rongnungi Australia Open semi final tonga asayaba tanabuba asayar kümogo.

Bodhbarnü Rod Laver Arena nung world number 93 asayar yagi service asemen tashi break süa asaya 6-3, 6-4


agi minute 78 nung koka liasü. La semifinal nung China tsür Zheng Qinwen den asayatsü.

Australia tsür Christine Matison-i 1978 küm Australia Open nung semi final tonga asayaba sülen tang tetsür qualifier tem rongnungi Yastremska-i semi tongogo.

Kasa mapang nung Noskova-i iba asayamung nung kanga junga asayaogo aser lai world number one asayar Iga Swiatek-a tasembuba round nung tsükdaktsüogo.

Tetsür kija asaya nungsa China tsür Zheng Qinwen-i Russia tsür Anna Kalinskaya 6-7(4) 6-3 6-1 agi koka tang mezüngbuba Australian Open semi final tongtetogo.

Rohan Bopanna No. 1 asayar tambusang kümogo



Aenjeti/January 24, 2024 (Agencies): India nunger nüngtugu tennis asayar Rohan Bopanna Bodhbarnü Australian Open 2024 tebur tarep asaya semi-final-i iogo. Pa tarep asaya nung No.1 asayar kümogo aser tennis puti otsü nung No.1 asayar tambusang küma otsü tasen ka yangluogo.

Arishi küm 43 tain Bopanna aser Matthew Ebden nati Argentina nunger tarep Máximo González aser Andrés Molteni na straight sets nung koka semifinal tongtetogo.

Tenati iba asaya 6-4, 7-6 (5) agi kokogo.

Hombarnü ATP rankings update asüba mapang Bopanna temaba jenjangi atutsü aser pa indang partner Ebden tanabuba jenjang nung asütsü.

Bopanna pa indang career nung tang mezüngbuba Australian Open semi-finals asayatsü lir. Pai taoba mapang French Open (2022) aser Wimbledon (2013, 2015 aser 2023) nung tebur tarep aaya semi-finals tonga asayaogo. Bopanna ya US Open (2010, 2023) nung anaben tashi runners-up liasü.

Pa 2017 küm French Open nung dang Grand Slam ka koka lir. Iba küm tarep temeyoktep asaya nung Canada tsür Gabriela Dabrowski den pai iba asayamung koka liasü.

Bopanna ya India nunger

tennis asayartem rongnungi takok tajung ngua asayaba asayar ka lir aser pai iba asayamung nung alizüing tasen ka tongteta asaya 500 tashi kokogo.

Leander Paes aser Sania Mirza nati tena indang career nung takok 700 dak tema ngua asayaogo aser Mahesh Bhupathi-ia pa indang career nung takok 697 ngutetogo.

Arishi küm 43buba nung Bopanna ya ATP Masters series doubles title abenba asayar tambusang aküm. Pai Ebden den Indians Masters koka liasü. Maneni pa ya year-end Finals nung asaya ka akokba asayar tambusang lir.

Bopanna 2006 küm mezüngbuba Australian Open kija asaya nung asaya aser iba sülen pa iba asayamung nung 17ben atonga asayaogo.

Satwik-Chirag World No. 1 tarep kümogo

New Delhi, Aenjeti/January 24 (Agencies): Taoba hopta ana tsüingda kanga junga asayaba sülen India nunger badminton asayar Satwiksairaj Rankireddy aser Chirag Shetty na tebur tarep asaya rankings nung tanaben temaba jenjangi tuogo.

Malaysia Open super 1000 aser India Open super 750 badminton asayamungtem nung runner-up nung tembangba sülen Asian Games koker aliba tarep ya tang agi tanabenbuba world no. 1 tarep kümogo.

India nunger tarep ya 2022 Asian Games, Hangzhou nung gold medal anguba sülen mezüngbuba taoba küm temaba jenjangi tua liasü.

India Open nung world no. 2 tarep ama asayaka Satwik aser Chirag nati Deobarnü final nung world champions Kang Min Hyuk aser Seo Sang Jae na mekoki liasü.

India nunger asayartem rongnungisa HS Prannoy-a jenjang ka tejakdangi tua tang 8buba nung lir aser kasa mapang nung Lakshya Sen, Kidambi Srikanth, aser Priyanshu Rajawat nunger ajak 19, 25, aser 30buba nungi masetshi-i lir.

Top 10 tarep:

1. Rankireddy Satwiksairaj & Shetty Chirag
2. Liang Wei Keng & Wang Chang
3. Kang Min Hyuk & Seo Seung Jae
4. Astrup Kim & Rasmussen Anders Skaarup
5. Chia Aaron & Soh Wooi Yik
6. Hoki Takuro & Kobayashi Yugo
7. Alfian Fajar & Ardianto Muhammad Rian
8. Liu Yu Chen & Ou Xuan Yi
9. Fikri Muhammad Shohibul & Maulana Bagas
10. Lee Yang & Wang Chi-Lin.

TMC-i Bengal nung tangar... (Tapak 3 nungi...)

Delhi nung Minister aser AAP lenir, Saurabh Bharadwaj-i, teloktep nung party tem tsüingda menden lemsatsüji kanga tasak, ajisiüka Mamata Banerjee aser Rahul Gandhi napronglai INDIA teloktepi takok angutsü nükjidong nung inyaker, ta ashi.

AAP lenirisa, "TMC ya West Bengal nung party tuluka lir; akhidang nungi Congress aser Left-i parnok (TMC) anema tokteper. TMC den menden lemsatsüji tasak asütsü. Parnok tsüingda mangatettep ajak bentetsü," ta

metetdaktsü. Bharadwaj-isa West Bengal nungi Congress lenir, Adhir Ranjan Choudhury dang mangatettep adoktsüsa Mamata Banerjee aser lar party anema mejembitsüla, ta mepishi.

INDIA teloktep nung mangatettep madoktsü nükjidong nung Congress lenir tain, Jairam Ramesh-i, "TMC ya INDIA teloktep nung tongshi ka. Mamata medenibo INDIA teloktep malitsü. Ken o junga jembitsü onoki imlar. Bengal nung INDIA-i longjemer tokteptsü," ta metetdaktsü.

Doomsday Clock: Ayatirm atongtsü... (Tapak 7 nungi...)

Tzü-mopung melenshiba kumzüka ayutsü asoshi mera peria magiba aser biological technologies aser Artificial Intelligence (AI) tools mashi lenmang nung amshiba nungi timtem ajurutsü aliba junga masadangba atema parnoki khuret lemsatet.

Iba anütetsü ya J Robert Oppenheimer aser külem US scientists temi 1947 nung bushitet. Atomic bomb yangluba nung parnok ajak dena liasü.

Iba anütetsü yangluba nükjidong ya nüburtem dang tekum dangtsü metetdaktsütsü aser alima nung lenirtem dang nuclear nok-nü tanaben mamshitsü asoshi ajungshitsü atema lir.

"Russia-i Ukraine nung raraba tangbo tatem kati marutsü amai lir aser iba rara nung Russia-i nuclear nok-nü amshitsü ya anameta nung lir. Tesüiba küm Russia-i aiben

nuclear amshitsü yimya tem agi sayua liasü," ta Bronson-i ashi.

"Nuclear aliba linük ka asünung Israel inyakyim ya Doomsday Clock jembishinü den tapet. Iba rara ya region nung tuluba akumtsü akok aser nuclear tashi aliba linüktem tali anasabai atsür arutsü," ta lai ashi.

"Satellite data yanglutetbab sülen alima ya 2023 küm tatsüktiba liasü aser alima nung greenhouse gas emissions maneni timba akumer. Alima rangben aser North Atlantic tzüyim indang temperatures tatsükba akum, aser Antarctic sea ice tajemba akum," ta Bronson-isa ashi.

2007 küm nungi anütetsü jajaba nung tzü-mopung melenshiba ya inoksem. Clean energy nung sen \$1.7 trillion indokaka greenhouse gas emissions ajemdaktsütsü asoshi mera agiba kanga ajema lir, ta Bronson-i ashi.

BILEMDANGANG
"Renema alirtem atema kecha tetsübu mali."